

مارننگ گو جری نیوز بلیٹن مورخہ 22 دسمبر 2025

یوہ آکاشوانی جموں بے باغ علی طاہر تیں خبر سنو۔

LG Freight Train

لیفٹنٹ گورنر منوج سنہا نے آناج لے غے کل وادی کشمیر مانہ پہلی مال بردار گڈی غی آمد ور بھارتی ریلوے نانہ مبارک دتی ہے۔ یوہ مال بردار گڈی کل 1 ہزار 3 سو 84 ٹن چاول لے غے وادی پُچی تھی۔ پہلی مال بردار گڈی غا وادی پُجن نانہ اک تا ریخی تے قابل یاد لمحو قرار دیتاں وان لیفٹنٹ گورنر نے کہیو جے اس نال وادی کشمیر نانہ قومی مال بردار ریلوے ٹانچہ سنگ جوڑیا جان غو یوہ دیرانہ خواب پورو ہو سکیو ہے۔ اُن غو کہنو تھو جے مال بردار گڈی غا باقاعدگی سنگ چلایا جان نال عام لوکاں، کاروبا ریاں تے ترقیاتی ٹانچہ نانہ فائدو پُجن غے نال نال موسمی للکاراں غے باوجود پورا سال ضروری چیزاں غی سپلائی نانہ یقینی بنایو جا سکے گو۔ اُن غو کہنو تھو جے اس نال جموں سرینگر قومی شاہراہ ور وی دیباؤ نانہ کھٹ کیو جا سکے گو۔ ایل جی موصوف نے جموں کشمیر غا اقتصادی فروغ غی خاطر چایا گیا اس قدم ور وزیر اعظم نریندر مو دی تے ریلوے وزیر اشونی ویشنو غو شکریو ادا کیو ہے۔ وزیر اعلیٰ عمر عبداللہ نے وی اس تاریخی لمحہ ور ریلویز نانہ مبارکباد دتی ہے۔

Pulse Polio

جموں کشمیر مانہ پولیو مخالف مہم سال 2025 غے تحت آج تے پہلک دو روز توڑی کھر کھر جا غے 5 سال غی عمر توڑی غا بچاں نانہ پولیو غا قطرا پلایا جائیں گا۔ شہری تے گرائیں علاقہ صحت عملہ غی ٹیم ان دو روز غے دورا خاص کر اُن بچاں نانہ جھیڑا مقررہ بو تھز ور جا غے پولیو غا قطرا نہیں لے سکیاتھا، اُن غا کھراں مانہ جا غے پولیو غا قطرا پلایا جان غو اہتمام کریں گی۔ دور دراز تے مشکل ترین علاقہ مانہ بچاں نانہ پولیو غا قطرا پلایا جان غی خاطر خصوصی ٹیم مقرر کی گئی ہیں۔ صحت محکمہ غا عہدیداراں نے آکاشوانی نیوز نانہ جانکاری دیتاں وان دسیو ہے جے اس مہم نانہ بہتر طریقہ سنگ انجام دین غی خاطر تمام ضروری انتظامات کیا گیا ہیں۔

Announcement

آکاشوانی جموں غا علاقائی خبراں غا شعبہ غی طرفوں کساناں بارے قومی تیہاڑا 2025 غا موقع ور 25 منٹ غو اک خصوصی پروگرام نشر وے گو۔ اس خصوصی پروگرام غو موضوع وے گو "اُن ہتھاں نانہ سلام جھیڑا مُلک نانہ کھلاویں"۔ اس خصوصی نشریات مانہ مہارہما مہمان وین گا جو انٹ ڈائریکٹر برائے ذریعی پیداوار تے کسان بہبود جناب سنجے آنند جھیڑا اپنا ماہرانہ خیالات سانجھا کریں گا۔ پروگرام غی میزبانی مہارہما اینکر وجے بجاج کریں گا۔ یوہ پروگرام آئندہ 23 دسمبر منگل ر آلیے روز دوپہر 12 بجے نشر کیو جائے گو۔

Paddy Jammu

جموں ڈویژن مانہہ خریف 26/2025 غے دوران تہان غی پیداوار حاصل کرن غو نوو ریکارڈ قائم ہوئو ہے ، جہیڑو کھٹو کھٹ امدادی قیمت ایم ایس پی تے محکمہ ذراعت غی لگاتار کو ششاں غی وجہ نال ممکن ہو سکیو ہے ۔ ہُن توڑی 4 لکھ 47 ہزار کو ینٹل چاول غی پیدہ وار حاصل کی گئی، جہیڑی ہُن توڑی غی سب تیں متی پیدہ وار ریکارڈ کی گئی ہے ۔ اس توں پہلاں تہا غی سب تیں زیادہ پیدہ وار سال 22/2021 غے دوران 4 لکھ 5 ہزار کو ینٹل حاصل کی گئی تھی۔ تہان غی اس ریکارڈ پیدہ وار غا حصول سنگ براہ راست فائدو منتقلی نظام غے ذریعے 6 ہزار 1 سو 30 کساناں نانہہ گُل 1 ارب 6 کروڑ 48 لکھ روپیاں غی آدائیگی کی گئی ہے ۔ تہانی حاصل کیا جان غی یاہ کا روائی اس مہینہ غی 31 تاریخ توڑی جاری رہ گئی۔ جس غی خاطر پورا جموں ڈویژن مانہہ گُل 29 منڈیں قائم کی گئی ہیں۔ محکمہ ذراعت غو کہنو ہے جے تہان غی اس حصولیابی سنگ کساناں غی بدھتی شرکت تے ایم ایس پی نظام مانہہ پھروسہ غو پتو چلے۔

Tawi River Front

جموں مانہہ تیار کیو گیو نووں توی ریور فرنٹ ہُن صحت تے تفریحی مرکز غا طور ور ابھر غے باندے آيو ہے، جت گذشتہ کل جموں میونسپل کارپوریشن تے جموں سمارٹ سیٹی غی طرفوں چہل قدمی تے تندرستی غا اک پروگرام غی میزبانی کی گئی۔ اس پروگرام غے دوران شہریاں نے چہل قدمی، بوگا تے سائیکلنگ سمیت فٹ ربن غا سلسلہ مانہہ ایسی دوجی کئی سرگرمیاں مانہہ حصولیو۔ اس موقع ور بولٹاں واں جے ایم سی کمشنر ڈاکٹر دیوانش یادو نے کہیو جے اس پروگرام غے دوران ریور فرنٹ غی طرفوں ہر عمر غا افراد واسطے شہر غے اندر ایسی صحت افزا سرگرمیاں غی خاطر سہولت مہیا کران غی اہمیت ور لوہ پائی گئی۔ انہاں نے دسیو جے سیاحتی ترقی تے سبز زاری غا ایسا پروگراماں ور کم جاری ہے ، تا نجے ایسا مقامات نانہہ لوکاں واسطے پُرکشش بنایو جاسکے۔

.Weather

وادی کشمیر مانہہ سخت ٹھنڈ ور مبنی 40 روزہ دور یعنی چلے کلاں اُچا پہاڑاں ور برفباری تے میدانی علاقہ مانہہ بارش ہون سنگ شروع ہو گیو ہے ۔ جموں غا اُچا پہاڑی علاقہ مانہہ وی برفباری تے بارش ہون غی اطلاع ملی ہیں، جس نال رات غا درجہ حرارت مانہہ قدرے بابدو ریکارڈ کیو گیو ہے ۔ کشتواڑ غا پہاڑی علاقہ تے مچھیل ماتا مندر غا علاقہ کہنی برفیلی چار غی لپیٹ مانہہ دیکھیا جاسکیں۔ اسے طرح وادی کشمیر غو گلمرگ علاقہ وی برفباری غا نتیجہ مانہہ سفید نظر آریو ہے۔ محکمہ موسمیات غی طرفوں آئندہ 24 گھنٹاں غے دوران مزید بارش تے برفباری غی پیشنگوی کی گئی جس نال وادی پھر مانہہ سردی غی مزید سخت لہر غی اُمید کی جا رہی ہے ۔ اسے دوران جموں سرینگر قومی شاہراہ ور دو پاسا تیں گڈیاں غی آٹو جائی جاری ہے ، البتہ مسافراں نانہہ صلاح دتی گئی ہے جے وے سفر شروع کرن تیں پہلاں سڑک غی صورتحال غو پتو لاویں۔

اس غے نال ہی خبراں غو یوہ بلیٹن ختم ہوؤ۔